

दिनांक : 24.03.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी पश्चिम एशिया हलका मांय शांति बहाल करण सारू बातचीत अर कूटनीति री हिमायत कीनीं
- सुप्रीम कोर्ट हिंदू, सिख या बौद्ध धर्म मानण वाळां ने ही अनुसूचित जाति रो दर्जो हासिल करण रा पात्र बतायां
- राजस्थान माध्यमिक शिक्षा बोर्ड दसवीं, आठवीं अर पांचवीं कक्षा रा इम्तिहान रा नतीजा रो ऐलाण कीनीं

अर

- राज्य मांय स्वामित्व योजना रा तैत हाल ताई 14 लाख 43 हजार 423 संपत्ति कार्ड बांटी ज्यां

000

प्रधानमंत्री नरेन्द्र मोदी आतूणी एशिया हलका मांय शांति बहाल करण सारू बातचीत अर कूटनीति री हिमायत कीनीं हें पश्चिम एशिया मांय चाल रही लड़ाई रा बारा मांय भारत रो रूख साफ करता थकां वे राज्यसभा मांय कह्यो के भारत तणा-तणी कम करण अर होर्मुज जलडमरूमध्य ने ओजू खोलण रो मुद्दो उठायो हें प्रधानमंत्री बतायो के पश्चिम एशिया मांय लड़ाई छिड़्यां पाछे वे खाडी देशां रा नेतावां अर ईरान, इजराइल अर अमरीका रा नेताओं ऊँ ई फोन रे ज़रिये बातचीत कीनीं श्री मोदी कह्यो के तीन सप्ताह ऊँ बत्ता बगत ऊँ पश्चिम एशिया मांय चाल रही लड़ाई ऊँ आखी दुनिया मांय गंभीर ऊर्जा संकट पैदा व्हे ग्यो है, ज्यो भारत सारू ई चिंता री बात हें प्रधानमंत्री कह्यो के देश ने इण रा असर ऊँ बचावण सारू न्यारी-न्यारी कोशिशें करी जा रही हें

000

सुप्रीम कोर्ट फैसलो दीनो है के केवल हिंदू, सिख या बौद्ध धर्म मानण वाळा ही अनुसूचित जाति री श्रेणी रो दर्जो हासिल करण रा पात्र हें अदालत साफ कीनो के किण ई दूजा धर्म ने मानण परां अनुसूचित जाति रो दर्जो खत्म व्हे जावे हें आंध्रप्रदेश हाई कोर्ट रा एक फैसला ने बरकरार राखता थकां न्यायमूर्ति पी. के. मिश्रा अर न्यायमूर्ति मनमोहन री पीठ ओ फैसलो दीनो पीठ कह्यो के ईसाई धर्म अपनावण वाळो अनुसूचित जाति अर अनुसूचित जनजाति अत्याचार निवारण कानून रा तैत संरक्षण रो दावो नी कर सके हें अदालत कह्यो के हिंदू, सिख या बौद्ध धर्म रे अलावा किण ई दूजा धर्म ने मानण परां अनुसूचित जाति री सदस्यता री काबिलियत नी रेहवे हें

000

फौज, नौसेना अर वायु सेना मांय मनमानी मूल्यांकन प्रक्रिया रे कारण स्थायी कमीशन हासिल नी कर सकी कम बगत री नौकरी करण वाळी महिला अहलकार अब पूरी पेंशन रो फायदो लेवण री हकदार व्हेलां सुप्रीम कोर्ट रा मुख्य न्यायाधीश न्यायमूर्ति सूर्यकांत, न्यायमूर्ति उज्ज्वल भुयान अर न्यायमूर्ति एन. कोटिश्वर सिंह री पीठ ओ फैसलो दीनो अदालत कह्यो के आं अहलकारां ने पेंशन पात्रता सारू ज़रूरी 20 साल री सेवा पूरी कर चुकी मानी जावेला, भले ही वां ने इण ऊँ पैली ई नौकरी ऊँ निकाळ दीरीजी हों विंग कमांडर सुचेता एडन कानी ऊँ दायर अर्जो समेत केई अर्जियां री सुणवाई करता थकां अदालत ओ फैसलो दीनो

000

राजस्थान माध्यमिक शिक्षा बोर्ड दसवीं, आठवीं अर पांचवीं कक्षा रा इम्तिहान रा नतीजा रो ऐलाण कर दीनो हें मैट्रिक मांय 94 दशमलव 23, आठवीं मांय 87.01 अर पांचवीं मांय पौने 98 फीसदी विद्यार्थी पास व्हेयां शिक्षा मंत्री मदन दिलावर अर बोर्ड रा प्रशासक शक्ति सिंह राठौड़ अजमेर मांय नतीजा रो ऐलाण कीनीं एक अप्रैल ऊँ स्कूलां खोलण रा सरकार रा फैसला रे कारण बोर्ड मार्च महीना मांय ई दसवीं रा नतीजा रो ऐलाण कर दीनो मैट्रिक रो इम्तिहान देवण सारू 10 लाख 68 हजार, आठवीं सारू 12 लाख 86 हजार अर पांचवीं री परीक्षा देवण सारू 13 लाख 68 हजार विद्यार्थी नाम मंडाया हां आवता सत्र ऊं परीक्षा मांय दो मौकां मांय ऊं बेहतर नतीजा वाळा मौका रा नतीजा मानण रो नियम लागू व्हेलां ई रा तैत दसवीं री परीक्षा साल मांय दो दफा फरवरी अर मई महीना मांय ली जावेलां और ब्यौरो म्हाणी अजमेर खबरनवीस ऊं-

000

राज्य मांय अक्टूबर महीना मांय चलायी ज्या सदस्यता अभियान रे दौरान सहकारी समितियां मांय नौ लाख सदस्य बणायी ज्यां सहकारिता राज्य मंत्री गौतम कुमार दक आज जयपुर मांय राष्ट्रीय सहकारी विकास निगम री ओर ऊँ राखी ज्या क्षेत्रीय उत्कृष्टता अर श्रेष्ठता पुरस्कार-2025 समारोह मांय आ जाणकारी दीनीं सहकारिता मंत्री कह्यो के मौजूदा दौर मांय ई हलका मांय 120 योजनावां चलायी जा रही हैं श्री दक सहकारी समितियां ने सामान देशी अर परदेशी बाजार मांय बेचण रा बारा मांय काम करण सारू कह्यो वे सहकारी समितियां री ऑडिट अर आमसभा टेमसर करावण बाबत् कह्यो वे न्यारी-न्यारी श्रेणियां मांय चोखो काम करण वाळी सहकारी समितियां ने ईनाम दे र नवाजीं

000

स्वामित्व योजना के तहत राज्य मांय हाल ताई 14 लाख 43 हजार 423 संपत्ति कार्ड दे दिया ज्या हैं केंद्रीय पंचायती राज मंत्री राजीव रंजन सिंह आज लोकसभा मांय एक सवाल रा जवाब मांय आ जाणकारी दीनीं वे बतायो राज्य रा 36 हजार 300 मांय ऊँ 35 हजार 932 गांवां मांय ड्रोन रे ज़रिए सर्वे करायो जा चुक्यो हैं प्रदेश मांय हाल ताई कुल 14 लाख 80 हजार 978 संपत्ति कार्ड बणा दिया ज्या हैं

000

कृषि अर किसान कल्याण मंत्री शिवराज सिंह चौहान कह्यो है के केंद्र सरकार री लगातार कोशिशों ऊं देश मांय किसानों री आमदनी मांय ध्यानजोग बधोतरी व्ही हैं वे आज लोकसभा मांय कह्यो के काश्तकारों री आमदनी न सिर्फ दूणी, बल्कि केई मामलां मांय तिगुणी अर आठ गुणी ताई बधी हैं

000

रेल मंत्री अश्विनी वैष्णव रेलवे रा '52 सप्ताह में 52 सुधार' अभियान रा तैत टिकट कैंसिल करावण, रकम पाछी देवण, रेलगाड़ी मांय सवार व्हेवण री ठौड़ मांय बदलाव, नमक अर गाड़ियां लावण-ले जावण अर बणाई-चुणाई रा काम री गुणवत्ता ऊँ जुड़्या नियमां मांय बदलाव री आज नई दिल्ली मांय जाणकारी दीनीं श्री वैष्णव बतायो के टिकट कैंसिल करावण ऊँ जुड़्या नुवां नियमां रे मुजब रेलगाड़ी छूटण रा 72 घंटा पैली ताई टिकट रद्द करावण री सूरत मांय कम ती कम फीस ली जावेलां गाड़ी जावण ऊँ 72 ऊँ 24 घंटा पैली री मियाद मांय टिकट रद्द करावण परां भाड़ा रो एक चौथाई शुल्क देवणो व्हेलां गाड़ी रवाना व्हेवण ऊँ 24 ऊँ 8 घंटा पैली ताई टिकट कैंसिल करावण परां किराया री आधी रकम पाछी दी जावेला, जद के गाड़ी री रवानगी रा बगत ऊँ 8 घंटा ऊँ कम बगत रहता टिकट कैंसिल करावण री सूरत मांय किरायो पाछो नी दियो जावेलां

रेल मंत्री बतायो के टिकट आखा देश मांय किण ई रेलवे कार्टर माथे कैंसिल कराया जा सकेलां श्री वैष्णव बतायो के अब मुसाफिरां ने रेल रवाना व्हेवण ऊँ आधा घंटा पैली ताई दूजी ठौड़ ऊँ सफर सरू करण रो सुबीतो मुहैया करायो जावेलां

000

आज विश्व क्षय रोग दिवस मणायी ज्यों ई मौके आखा राज्य मांय कार्यक्रम राखी ज्यां सवाईमाधोपुर मांय जिला कलेक्टर कानाराम आयुष्मान आरोग्य शिविरां री सरुआत कीनी, जठे एक्स-रे मशीनां मरीज कने ले जा र वां रो ईलाज कर्यो जा रह्यो हैं वठे केंद्रीय संचार ब्यूरो री ओर ऊँ महिला संगोष्ठी अर सवाल-जवाब री होड राख र टी.बी. री बीमारी रा लक्षण अर वां री रोकथाम रा बारा मांय जाणकारी दीरीजीं डीग जिला मांय आज 100 दिन चालण वाळो टी.बी. मुक्त भारत अभियान सरू करी ज्यों जिला कलेक्टर उत्सव कौशल स्वास्थ्य विभाग रा अहलकारां सागे मीटिंग कीनी अर जागरुकता रैली ने रवाना कीनीं मुख्य चिकित्सा अर स्वास्थ्य अधिकारी विजय सिंघल बतायो के आवता 100 दिन ताई पिछाण करी ज्या हलकां मांय छांटी ज्या मरीजां रो ईलाज कर्यो जावेलां टी.बी. मुक्त भारत अभियान रो मकसद साल 2030 ताई देश मांय टी.बी. री बीमारी ने जड ऊँ खत्म करणो हैं

000

हनुमानगढ़ जिला मांय संगरिया रा कृषि विज्ञान केंद्र मांय आज 'किसान सारथी टू प्वाइंट ओ' रा तैत जागरुकता कार्यशाला राखी ज्यों ई मौके कृषि तकनीकी अनुप्रयोग अनुसंधान संस्थान, जोधपुर रा निदेशक डॉ. जे.पी. मिश्रा बतायो के 'किसान सारथी 2.0' पोर्टल भारतीय कृषि अनुसंधान परिषद अर इलेक्ट्रॉनिक्स अर सूचना प्रौद्योगिकी मंत्रालय री मदद ऊँ चलायो जा रह्यो हैं वे कह्यो के ई रे ज़रिए किसान मोबाइल ऐप, इंटरनेट पोर्टल या फोन कॉल सेवा रे ज़रिए साखां, पशुपालन अर बागवानी ऊँ जुड़्या मुददां रा बारा मांय जाणकारी हासिल करी जा सके हैं

000

प्रधानमंत्री नरेन्द्र मोदी आकाशवाणी ऊँ हर महीना प्रसारित करया जावण वाळा खास कार्यक्रम "मन की बात" मांय 29 मार्च-दीतवार ने विचार बतावेलां आ ई कार्यक्रम री 132वीं कडी व्हेलां ई सारू आप ई मुफ्त नम्बर 1800-11-7800 माथे 27 मार्च ताई राय दे सको हों विचार नरेन्द्र मोदी एप अर माय जीओवी ओपन फोरम रे ज़रिए ई भेजा जा सके हैं

000